

UNA UČI ALKU KLANJATI

Za boravka na ramazanskom vikendu u rodnom gradu, Bosanskoj Dubici, odveo sam kćerku Unu i nećakinju Alku u Gradsku džamiju. Bilo je doba podne-namaza, pa je moja kćerka objasnila svojoj sestričnici što je podne-namaz i kako se klanja. Bilo mi je zanimljivo to slušati, najviše zbog toga da vidim što mi je kćer naučila učeći arapski jezik i kako će objasniti sve što je potrebno da se podnevni namaz učini u potpunosti. Nakon što je objasnila da je za svaki namaz potrebno uzeti abdest, što su obje i učinile, objasnila je kako se zanijeti podne namaz, proučivši: „Nevejtu en usallije lillahi teala salate sunneti zzuhri edaen mustakbilel kibleti - Allahu ekber.“

Onda joj je rekla da se „na prvom rekatu uči Subhaneke, Euza, Bismilla, Fatiha i Sure, zatim da učine ruku i sedždu, a nakon toga slijedi drugi rekat na kojem se uči Bismila, Fatiha i Sure te ponovo čini ruka i sedžde, poslije čega se ostane sjediti i učiti Ettehijjatu.“ Objasnila je da se „poslije proučenog Ettehijatu ustaje na treći rekat na kojem se uči što i na drugom, ponovi se ruku i sedžde i vraća na četvrti rekat te učimo isto što i na drugom i trećem, ponovi se ruku i sedžde i ostaje na završnom sjedenju (Kade-i Ehire) gdje se uči Etehijatu, Salavati i Dova, onda se preda selam i time su, znaš Alka, klanjani podnevni sunneti, a onda se klanjaju podnevni farzi i sun-sunneti. I to bi bilo sve.“

Mogu reći da bi i njen učitelj, imam Rahim ef. Zeća, bio zadovoljan i da bi je pohvalio. Ja sam samo fotografirao Unu kako Alki pokazuje osnove klanjanja, a ovdje donosim nekoliko osnovnih fotografija.







Poslije sam se s obje djevojke popeo na munaru Gradske džamije, dakako uz odobrenje dubičkoga imama Safeta ef. Beganovića, a na munari je snimljena ova fotografija Bosanske Dubice.



K. M.